



16

Niining Leksyona Matun-an Mo Kini

Ang Buluhaton Sa Espiritu Santo


Kaguol ug Kalipay

Kadaugan Batok sa Kalibutan

ANG BULUHATON SA ESPIRITU SANTO

(Basaha ang Juan 16:4-15)

Makalima ka higayon naghigut si Jesus mahitungod sa Espiritu Santo diha sa katapusang panihapon uban sa Iyang mga tinun-an. Basaha ang Juan 14:16,17; 14:26; 15:26 ug 16:7-15. Sa unang tulo ka mga bersikulo gihisgutan ang Amahan, si Jesus ug ang Espiritu Santo aron masabtan nato nga kining tulo mao ang usa ra ka Dios.



Ang pulong nga manlalaban nagagikan sa Griego nga pulong "Paraclete." Kini nagapasabot ug usa ka magtatambag o abugado nga alang makapanalipod sa usa ka tawo ug magatabang kaniya. Ginabuhat kini sa Espiritu Santo alang kanato. Siya nagapanalipod kanato. Nagatambag Siya kon unsay angay nga pagabuhaton. Siya mao ang Espiritu sa kamatuoran nga nagatudlo ug nagagiya kanato ngadto sa kamatuoran. Naga-iway Siya kanato gikan sa mga bakakon nga mga magtutudlo.

Nagapahibalo Siya sa kalibutan nga dili maayo ang sala. Lisod kaayo natong angkonon nga kita makasasala. Nagatoo kita nga matarung na kita hangtud nga gipadayag sa Espiritu kon unsa gayud ang atong pagkatawo atubangan sa Dios. Natingala ka ba kon nganong nahugawan ang imong sinina? Sulod sa balay wala man nimo

makita ang maong mansa. Apan atubangan sa mahayag nga adlaw nakita mo ang mansa. Ang Espiritu Santo nagapakita kon unsa ka hugaw ang atong mga sala.

Buhata Kini

1. Unsa ang Griego sa pulong nga "Manlalaban?"
 - . . . a) Parenthesis
 - . . . b) Paraclete
 - . . . c) Paralysis
2. Ingon nga Paraclete unsa may mabuhat sa Espiritu Santo?
 - . . . a) Siya magapanalipod, magtambag ug magatabang kanato.
 - . . . b) Siya mao ang nagabuhat sa atong buluhaton.
 - . . . c) Nagahukom Siya kanato.
3. Anus-a kita makaingon nga kita gayud makasasala.
 - . . . a) Kon madakpan kita
 - . . . b) Kon ipadayag na sa Espiritu Santo kon unsa kadautan kita.
 - . . . c) Kon adunay lain nga magaingon kon unsa kadautan kita.
4. Pag-ampo nga kanunay mong hatagan ug luna ang Espiritu Santo nga magagiya kanimo. Pangayo Kaniya nga ipakita Niya ang mga dili maayong butang nga anaa kanimo.

KAGUOL UG KALIPAY

(Basaha ang Juan 16:16-24)

Nasubo ang mga tinun-an tungod kay mo-biya na si Jesus kanila. Apan nagahatag si Jesus kanila ug usa ka kahibulongang saad.

Juan 16:23. Kon mangayo kamog bisan unsa gikan sa Amahan, kini igahatag Niya kaninyo pinaagi sa akong ngalan.

Kon mangayo kita ug usa ka butang ngadto sa usa ka inila nga tawo nga wala makaila kanato dili gayud kita makadawat sa atong ginapangayo tungod kay wala man Siya makaila kanato. Apan kon hatagan kita ug katungod sa pagpangayo pinaagi sa ngalan sa atong pangulo sa nasud, ang tanan magadagan paghatag sa atong gikinahanglan. Ang Dios nga Amahan magahatag gayud sa ginapangayo sa Iyang Anak. Kon togutan ta si Jesus sa pagpuyo sulod kanato, makaampo kita pinaagi sa Iyang ngalan. Ug makaseguro kita sa tubag.

Buhata Kini

5. Unsa may gisaad ni Jesus?

- . . . a) Makabaton kita sa bisan unsang atong gusto.
- . . . b) Ang Dios magahatag kanato sa bisan unsang atong pangayoon pinaagi sa ngalan ni Jesus.
- . . . c) Dili na gayud kita maguol.

KADAUGAN BATOK SA KALIBUTAN**(Basaha ang Juan 16:25-33)**

Nasayud si Jesus nga hapit na Siyang pagadakpon ug nga ang tanan Niyang mga tinun-an mopalayo gikan Kaniya aron pagluwas sa ilang kinabuhi. Wala sila masayud kon unsay mahitabo. Buot ni Jesus nga ipasabot ngadto kanila nga ang Iyang kamatayon dili maoy kapildihaan. Kini kabahin sa plano sa Dios. Tungod kay pinaagi sa Iyang kamatayon ang mga katawhan mamaluwas.

Ang kalibutan moingon, “Kalimti ang uban, ug luwasa ang imong kaugalingon!” Apan gidaug na ni Jesus ang mga pagsulay sa kalibutan. Nabuhat na Niya ang buot sa Dios ipabuhat Kaniya. Ang pagbuhat sa buot sa Dios sa atong kinabubi bisan unsay mahitabo, maoy kadaugan batok sa kalibutan.

Ang mga tinun-an usab magaanus, nagapahinumdom si Jesus kanila sa pagpabilin kanunay diha Kaniya ug Siya magatabang kanila. Kadtong tanan nga musonud Kaniya magaatubang ug mga suliran ug mga pag-antus niining kalibutana, apan magatabang ang Espiritu Santo kanato. Ang atong kadaugan wala magaanus kon unsay atong mahimo kon dili unsay Iyang mabuhat nganhi kanato. Siya uban kanato aron magahatag kanato ug kadasig, kalig-on, ug kalinaw sa panahon sa kalisod. Ang atong pag-antus alang kang Jesus daklit lamang unya sa umalabot mohari kita uban Kaniya sa walay katapusang kalipay diin wala nay pag-antus hangtud sa hangtud;

Juan 16:33 Gisulti ko kini kaninyo aron makabaton kamog kalinaw pinaagi sa inyong pagkahiusa kanako. Paantuson kamo sa kalibotan, apan ayaw kahadlok kay gidaog ko na ang kalibotan.

Buhata Kini

6. Basaha ang Juan 16:33 sa makalima.
7. Unsa may ikasulti sa kalibutan?
 - . . . a) "Kalimti ang imong kaugalingon ug luwasa ang uban!"
 - . . . b) "Luwasa ang imong kaugalingon ug ang uban usab!"
 - . . . c) "Kalimti ang uban ug luwasa ang imong kaugalingon!"
8. Unsa may gisulti ni Jesus nga pagabuhaton sa kalibutan ngadto sa mosunod Kaniya?
 - . . . a) Himoon silang magdudumala.
 - . . . b) Pagapaantuson sila.
 - . . . c) Magadawat kanila ingon nga magtutudlo.
9. Unsa may kadaugan ngadto sa mga nagsunod kang Jesus?
 - . . . a) Maghimo sa ilang kaugalingong kabubut-on.
 - . . . b) Mahilikay gikan sa kasakit.
 - . . . c) Magahimo sa kabubut-on sa Dios bisan unsay mahitabo.
10. Itandi ang imong mga tubag sa hustong mga tubag nga anaa sa katapusan niining leksyona.
11. Sulati ang imong Rekord sa Estudyante alang sa ika-16 nga leksyon.

Mga Tubag sa Ika-16 nga Leksyon.

Kon aduna kay 6 o 7 ka hustong tubag markahi ug labing maayo, kon 5 markahi ug maayo, kon 4, kasarangan. Kon kubos sa 4 ang imong hustong tubag basaha pag-usab kining leksyona.

1. b) Paraclete
2. a) Siya magapanalipod, magatambag ug magatabang kanato.
3. b) Kon ipakita sa Espiritu Santo kon unsa ka dautan kita.
5. b) Ang Dios magahatag kanato sa bisan unsang atong pangayoon pinaagi sa ngalan ni Jesus.
7. c) "Kalimti ang uban ug luwasa ang imong kaugalingon!"
8. b) Pagapaantuson sila.
9. c) Magahimo sa kabubut-on sa Dios bisan unsay mahitabo.

Gidaghanon sa hustong tubag _____

Grado _____